

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

SOALAN

Minta **MENTERI BELIA DAN SUKAN** menyatakan langkah-langkah jangka masa panjang Kerajaan untuk memastikan golongan belia dapat memperolehi pekerjaan yang tetap dalam keadaan pengangguran belia yang tinggi di samping perubahan mendadak yang berlaku dalam ekonomi akibat perkembangan revolusi Industri 4.0 (IR 4.0).

JAWAPAN

Yang di-Pertua,

1. Untuk makluman Ahli Yang Berhormat, Kajian Kos Sara Hidup Belia dan Keperluan Belia Malaysia oleh Institut Penyelidikan Pembangunan Belia (IYRES) mendapati terdapat 4 cabaran yang menjadi kebimbangan belia antaranya adalah isu pengangguran dan peluang pekerjaan. Berdasarkan statistik Jabatan Perangkaan Malaysia (DOSM), kadar pengangguran belia yang berumur 15 hingga 30 tahun pada tahun 2017 adalah sebanyak 6.7%. Keadaan ini menunjukkan bahawa isu pengangguran belia perlu ditangani dengan segera supaya tidak berlaku peningkatan jurang agihan pendapatan yang akhirnya akan meningkatkan kadar kemiskinan.

2. Sehubungan itu, dalam usaha menangani isu pengangguran dan peluang pekerjaan, Kementerian Belia dan Sukan (KBS) telah memberikan

penekanan kepada aspek keusahawanan serta TVET melalui 22 Institusi Latihan Kemahiran Belia dan Sukan (ILKBS) yang terdiri daripada:

- (a) 13 Institusi Kemahiran Belia Negara (ILKBN);
- (b) 8 Institusi Kemahiran Tinggi Belia Negara (IKTBN); dan
- (c) 1 Akademi Kemahiran Belia Golf (AKBG).

3. Pada tahun 2015 sehingga 2019, KBS berjaya menghasilkan graduan seramai 26,456 graduan. Dalam tempoh tersebut, berlaku peningkatan kepada kadar kebolehpasaran graduan ILKBS daripada 80% pada tahun 2013 kepada 93% pada tahun 2018. Ia juga secara tidak langsung meningkatkan gaji purata graduan ILKBS daripada RM1,200 kepada RM1,678. Dalam usaha menangani isu pengangguran belia, KBS sentiasa memastikan bahawa kursus yang ditawarkan di ILKBS adalah bersesuaian dengan penawaran dan permintaan pekerjaan.

4. KBS telah memperkenalkan inisiatif baharu iaitu Pendigitalan IR4.0@ILKBS dan mempelbagaikan pendekatan latihan kemahiran seperti *Teaching Factory* dan *Bootcamp* TVET sebagai usaha menyediakan anak muda menghadapi Revolusi Industri 4.0 dan seterusnya melahirkan modal insan yang berkemahiran tinggi mengikut keperluan industri.

5. Selain itu, KBS telah memperkenalkan program *Skills Training at Risk Youth* (STAR@U) yang bertujuan menawarkan latihan kemahiran secara modular menerusi kursus jangka pendek kepada belia berisiko. Antara program di bawah program STAR@U adalah Reben Kuning dan *MyFuture Youth*.

6. KBS juga telah memperkenalkan beberapa program bagi memberi pendedahan kepada para belia berkenaan dengan ilmu keusahawanan. Program-program ini dibangunkan antara lain bertujuan untuk membangunkan ciri-ciri keusahawanan dan memupuk pembudayaan keusahawanan kepada para belia untuk memilih bidang keusahawanan

sebagai kerjaya utama mereka. Antara program keusahawanan yang dilaksanakan oleh KBS adalah *Y-Career*, *Youth Business Expo* (YBEX) dan *Facing Up With Social Entrepreneurship* (FUSE).

7. KBS juga telah memperkasakan Akademi Pembangunan Belia Malaysia (APBM) Batu Gajah sebagai pusat latihan dan bimbingan, rujukan dan penyelidikan keusahawanan belia bagi mencapai hasrat Kerajaan untuk melahirkan generasi usahawan belia yang cemerlang, cekap, berilmu dan berdaya saing.

8. Selain itu, bagi meningkatkan peluang pekerjaan dalam kalangan anak muda, KBS telah menubuhkan Jawatankuasa Peluang Pekerjaan Anak Muda yang akan dipengerusikan oleh YAB Perdana Menteri. Jawatankuasa ini terdiri daripada pihak Kerajaan, syarikat berkaitan Kerajaan (GLC), perbankan, penyelidik, dan peneraju industri. Penglibatan pelbagai pihak ini merupakan satu usaha dalam membantu Kerajaan ke arah mencapai mewujudkan 1 juta peluang pekerjaan kepada anak muda dalam tempoh 5 hingga 10 tahun seperti yang terkandung dalam Manifesto Kerajaan. Antara isu-isu yang akan dibincangkan oleh jawatankuasa ini meliputi pengangguran, tawaran gaji rendah, peluasan sektor pekerjaan dalam pelbagai bidang, kesepadanan pendidikan/latihan mengikut keperluan industri dan lain-lain.

Sekian, terima kasih.